

Te Heheuraa Api

E ITE IĀ OUTOU I TE PARAU MAU, E NA TE PARAU MAU OUTOU E FAATIAMA

TE VE'A A TE EKALESIA A IESU MESIA I TE FEIA MO'A
I TE MAU MAHANA HOPEA NEI

NENEIHIA I PAPEETE, TAHITI, I TE MAU AVA'E ATOA

Te hoo: E 30 farane i te matahiti.

Nº 2

-- FEBUARE 1956 --

MAT. 43

Samasona E Delila.

(Te Mau Tavana, Pene 16)

E hara hoi to Iseraela i mua i te aro o te Atua ia faai-poipo atu ratou i te melo no vetahi ê ra mau haapaoraa. Ua parau atura te Atua, ia na reira ana'e outou, e mea papu roa ia e moe ia outou to outou faaroo mau, e e riro atoa'tu hoi outou ei mau taata haamori idolo mai ia ratou ra.

Area ra, ua patoi ana'e atura te tahi pae o ratou ra i taua faaueraa, e o Samasona atoa hoi te tahi o ratou ra tei patoi i taua faaueraa ra.

Ua here hoi Samasona i te hoê tamahine Philiseti, o Delila to'na ra i'oa. E te ite atoa ra hoi te mau Philiseti, oia hoi, to'na ra mau enemy e, te here noa nei o Samasona i taua tamahine nei. E no te reira, ua feruri atura ratou e, e mea tia'e ia rave ratou i teie tamahine ei tautururaa'tu ia ratou i te haru raa ia Samasona, e ia faariro atu hoi ia'na ei tîti na ratou ra. Ei reira, ua haere maira te mau Philiseti i taua tamahine nei e ua ani maira ia'na ia imi i te puai rahi o Samasona i te vairaa, ia tia hoi ia ratou ia ruurnu ia'na i te taura. E no te mea hoi, e tamahine Philiseti mau, e te parau mau hoi oia ra, i to'na ihora mau taata i te mau Philiseti, ua tupu ihora to'na oaoa ia haapao i ta ratou ra mau faaueraa.

I te hoê mahana, ua parau atura Delila ia Samasona, a faaite mai na oe i to oe na puai rahi i te vairaa, e eaha hoi te ravea ia faaore i to oe na puai; ua na ô atura Samasona, "Ia ruuruu ratou ia'u i na ieie e hitu aore â i mârô ra, e riro ia vau mai te taata atoa ra i te paruparu i reira.

I reira ihoa, ua parau atura Delila i te mau tavana o te Philiseti ia hopoi mai i na ieie e hitu; inaha, ua hopoihia maira, e ua ruuruu ihora ratou ia'na. Te tia'i noa atoa ra hoi te tahi mau Philiseti i roto i te tahi piha o teie tamahine ma te faaineine ia ratou iho no te haru atu ia Samasona, e ma te mana'o atoa'tu e, e mau to'na ra puai i teie mau ieie i taamuamuhia i nia ia'na ra.

Ei taua taime ra, e here rahi a'e hoi to Delila i to'na ra taata, i te taata e here noa ra ia'na; ua parau atura oia ia Samasona, "Ua haavare mai oe ia'u". A faaite mai na oe, eaha te vahi e ore ai oe e pohe.

Ua na ô atura Samasona, "Ia ruuruu ratou ia'u i te taura api ra, aore â i ravehia ra, e riro ia vau mai te taata atoa ra i te paruparu i reira."

Ua afai maira te mau Philiseti i te taura api ia Delila ra, ei muri iho, ua tapuni ana'e atura i roto i te piha, ei taua taime ra, te taamuamu ra ia Delila ia Samasona, e ua parau atura, "E Samasona, teie iho nei te Philiseti e rave ia oe na inaha, ua tia a'era Samasona i nia, e motumotu faahou iho ra te taura i ruuruuhia i nia ia'na ra.

Ua tamata faahou ihora Delila i te imi maite i te puai o Samasona i te vairaa. I reira, ua na ô atura Samasona, "E raraa oe i na io rouru e hitu o to'u upoo nei i roto i tena na ahu, e ore hoi ia o'u e puai faahou." Inaha, ua raraa

ihora oia i to'na ra rouru, e ua pii atura i te mau Philiseti, e ua parau atoa'tu ia Samasona, "Teie mai nei te Philiseti e rave ia oe." I reira ihoa, ua ou'a ihora Samasona i nia ma to'na puai rahi o tei vai noa ra.

E no te ravea ore a teie tamahine, ua haamata ihora oia i te here atu ia Samasona, e te ani faahou atu i to'na vahi puai: e no te onoono o teie tamahine, ua faaite ihora Samasona i te parau mau ia'na a na ô atu ai oia e, "Ahiri to'u rouru e motu, o te hopea atoa ia o to'u nei puai rahi."

Ua horo atura Delila i te mau Philiseti ra, e ua faaite atura i te ravea e pohe ai Samasona. Inaha ra, ua horoa maira te mau Philiseti i te moni na'na ra, e ua haere ana'e ratou i to'na ra fare no te tia i raa ia Samasona.

I to Samasona hoi haere raa mai ia Delila, ua faataoto ihora oia ia'na i nia i to'na turi; e ia varea hoi o Samasona i te taoto, ua faane atura teie tamahine i te hoê taata ia hahu i to'na ra rouru, e ua faaara ihora oia ia'na ma te pii atoa'tu i te mau enem i o Samasona ia haru ia'na ra. I taua taiwe ra, ua mana'o ihora Samasona e, te vai noa ra to'na puai rahi mai te matamua ra, e aita roa hoi oia i ite e, ua rave ê atu te Atua i to'na mana mai nia'tu ia'na ra, no to'na hoi faaiteraa'tu i te vai raa o to'na ra puai.

E a tia'i oia i nia, ua ite ihora oia e, aore ona e puai faahou. Inaha, ua ite atoa maira te mau Philiseti e moemoe haere i roto i te piha i te ohipa e tupu, ua oaoa ana'e atura ratou. Ua haru ihora ia Samasona, haapo ihora i to'na ra mata, afai atura i roto i te fare tapea raa. Faarave ihora ia'na i te ohipa taviri sitona mai te hoê tâtî te huru. O te

tahi na utua ia ta'na i horoa hia'tu e te Philiseti, no to'na hoi haapao-ore-raa i te faauneraa a te Atua ra.

E no to ratou hoi oaoa rahi, ua faahanabana ihora ratou i taua mahana ra no te roaa raa hoi Samasona ia ratou. E ua faatupu hia hoi taua faaoaoa raa ra i roto i te hoê fare rahi o tei i roa i te taata, te tane e te vahine hoi, e tei reira atoa te mau tavana o te Philiseti; e e toru hoi tauatini mau taata i roto i taua fare ra i te mataitairaa i te ohipa e rave hia ra.

Inaha, ua pii, e ua faco maira te mau taata ia'na i to'na afairaahia mai mai te fare tapearaa ra.

Ei reira, na ani atura oia i te hoê tamaiti i mau noa i to'na ra rima, "A faaite mai na oe ia'u i na pou e mau ra i teie fare, ia tapea na vau." E i to'na hoi tapearaa'tu i taua na pou nei, ua tiaoro atura oia ia Iehova ma te na ôraa e, "E te Fatu, e haamana'o mai oe ia'n, o ta'u ia pure ia oe i teie nei, e faaetaeta mai na Oe ia'u nei, hoê roa ra faaetaetaraa toe o teie ana'e nei, ia tahoo na vau i te Philiseti nei i to'u nei pue mata."

E i to'na hoi tapearaa i na pou e piti nei i ropu e mau ai taua fare ra, ua tiaoro faahou atura oia i te Atua, mai te na ô atu e, "Ia pohe noa'tu vau i te poheraa o te Philiseti nei." Inaha ua ho'i faahou maira to'na ra puai, e ua faa-hope a'era oia i te reira, e ua mairi ihora taua fare ra i raro i nia i te mau tavana o te Philiseti, e tae noa'tu i te mau taata atoa i roto ra. Eua rahi a'e hoi te taata tei pohe ia'na i taua poheraa no'na ra, i tei taparahihia e ana i te oraraa ra.

Tahakura Hutihuti.

LA BRANCHE FRANCAISE

LE SOIN DU CORPS EST UNE EXPRESSION DE FOI:

Les Saints des Derniers Jours attachent une grande importance au soin du corps. Celui qui abîme son corps par sa mauvaise façon de vivre ne peut atteindre son plus haut degré d'utilité, d'intelligence et de bonheur.

Dans les Doctrines et Alliances il y a de nombreuses révélations au sujet du corps humain et de son importance en tant qu'instrument de l'esprit. "L'esprit et le corps forment l'âme de l'homme." (Section 88, verset 15.) Dans un autre verset nous lisons que l'esprit se manifeste par le médium du corps. C'est pourquoi la condition physique du corps facilite ou entrave l'expression de l'esprit.

Les choses telles que la nourriture, les vêtements, les habitations convenables et les comforts de la vie ont été donnés "pour fortifier le cœur et pour vivifier l'âme." (Doc. et All. 59:19) Le verset 124 de la section 88 nous donne des instructions pour le soin de notre corps: "Cessez d'être oisifs; cessez d'être impurs; cessez de chercher les défauts les uns des autres; cessez de dormir plus qu'il ne faut; couchez-vous de bonne heure, pour n'être point fatigués; levez-vous de bonne heure, pour que vos corps et vos esprits soient fortifiés."

Il y a alors la Parole de Sagesse (section 89) qui donne des instructions bien détaillées et spécifiques; le tabac, les boissons fortes ou échauffantes, la viande en trop grande quantité, "ne sont pas bons pour l'homme," tandis que les fruits dans leur saison sont bons pour l'usage de l'homme, et le blé est spécialement pour l'homme.

L'obéissance à ces commandement est récompensée par certaines bénédictions.

Il y a aussi des révélations dans les Doctrines et Alliances qui indiquent que le soin du corps est un devoir religieux.

L'attitude de l'esprit et les émotions ont un effet sur la santé du corps. Ce fait fut énoncé par Jésus, et se trouve amplement justifié, si c'est nécessaire, dans ce que nous a révélé l'étude du corps humain. Christ nous assure que la colère, la peur, la haine, et toutes les émotions de ce genre, provoquent des troubles dans notre organisme. Théologiquement il déclare: "Tu ne te mettras pas en colère contre ton frère." Mais la science nous donne la raison. Voici ce que dit Herbert Spencer à ce sujet: "La biologie nous apprend qu'aucun acte ne devrait être commis ni aucune pensée entretenue qui affaiblit le corps, car c'est ce qui rend l'être humain impropre aux devoirs de la vie."

Nous pouvons lire dans la Sainte Bible, "Ne savez-vous pas que vous êtes le temple de Dieu, et que l'esprit de Dieu habite en vous? L'homme qui détruit le temple de Dieu sera détruit lui-même par Dieu." (I Corinthiens 3:16-17) Quand Jésus-Christ reviendra pour la seconde fois, croyez-vous qu'il fumera des cigarettes, des cigares, ou une pipe? NON. Pourquoi? Parce que ces choses ne sont pas bonnes pour le corps. Alors, on peut voir facilement que nous devons nous abstenir complètement de ces choses. Si Nous Sommes De Vrais Chrétiens-spécialement les hommes qui dirigent les Eglises Chrétiennes. Personne n'est parfait sur la terre et nous devons suivre l'exemple de notre Sauveur qui est parfait.

L'obéissance aux lois de santé, à la fois celles révélées par Dieu et celles découvertes par l'homme dans sa recherche de la vérité, exprime notre foi dans les enseignements de l'Eglise au sujet de la sainteté du corps.

Préparé par Ancien Thomas Stone.

Te Tomoraa Fare Putuputuraa Api i te Amaa o Ziona i Haua - Haramaea Tubuai.

Te tere faaati o te Peresideni o te Ekalesia a Iesu Mesia i te Feia Mo'a i te mau Mahana hopea nei. Na te mau fenua Apatoa: Tubuai, Raivavae, Rurutu e Rimatara.

(Isaia 52:7-8) "*Te nehenehe o te avae o te vea i nia i te mou'a, o tei hopoi mai i te parau maitai ra, o tei faaite hua mai i te parau hau ra! o tei hopoi mai i te parau oaoa o te maitai ra, o tei faaite hua mai i te ora ra! o tei parau mai ia Ziona, Tei to Atua ra te hau! 8 E faateitei to mau faehau i to ratou re'o; e umere paatoa to ratou re'o; e hi'o hoi ratou, te mata e te mata, i to Iehova faaho'iraa mai ia Ziona.*"

E hoa here ma e, te oaoa nei matou atoa i te faaite atu ia outou atoa o te mau taata tai'o vea o te Heheuraa api.

I te 20 no te avae Titema 1955, ua tapae mai te pahira o Paraita i Tubuai nei i te poipoi roa i taua mahana ra. E tei nia iho te Peresideni ra o Elita Christensen e ta'na atoa na tamahine too toru o Vero, Jeannette, Lynda, e ua Orometua ra o Les Westrum e Toma Stone.

I te taima i tae mai ai ratou, ua faarii poupouhia atu ratou e te mau melo o te Ekalesia, e ua faatupuhia te hoê faariiraa i Taahuaia i roto i te fare Putuputuraa a te Ekalesia iho, i reira ua faaineinehia te hoê tamaaraa rahi. E ua faataa maitai te tuutu i te mau maa e au no te opu, e o Tautu-faahia a Turina te tuutu. E mea maitai roa taua farereiraa.

E i te 21 no taua avae ihora oia hoi ia poipoi a'e, ua haere ana'e maira o Elita, na tamahine e na orometua i te utuafare o Tote raua o Nina, no te hoê atoa ia tamaaraa poipoi, e mea oaoa roa matou i te farereiraa i te utuafare nei.

I te 22 no Titema 1955, i te Amaa i Ziona i Haua Haramea Tubuai, i te hora 12, ua tomohia te fare Putuputuraa, ua tairuru te mau melo atoa e te mau manihini i mua mai i teie fare. E na Elita Peresideni o te Misioni i faate-re e na Tetauira Tahiaata i aratai hou te tomoraa, ua parapa-rau maira o Elita i te hoê mana'o, i te otiraa to'na mana'o, ua himenehia te hoê himene reo tarava.

Teie tenpoo himene "Taviri haaviti Elita i te opani."

I te taime a taviri ai o Elita i te opani o tana fare ra, ua tomo atu te mau taata i roto, e hope paatoa'tura i roto.

Ua haamatahia atura te hoê pure no te haamaitairaa i te fare e na Elita Peresideni i auaha te pure i te otiraa te pure haamaitairaa. I reira ua haamatahia te pureraa a'oraa Evanelia na roto i te himene N° 135 e na Teuruna a Tehoiri i aratai, na Tetauira Tahiaata te pure matamua e na Elita te a'oraa matamua, parau tumu, te parau ia note Buka a Moromona, te huru o te apiraa o Iosepha Semita e tae noa'tu te tupuraa o te Ekalesia i te rahiraa, to'na haamataraa i teie pae au moana nei, te Evanelia i te fenua Tubuai nei ia na roto i te tonoraa mai o Iosepha Semita, e na Orometua ra o Paraita Atitona, Noa Roteria e o Beniamina Turuati, i te mahana toru i te 1 no te Avae Me 1844.

Te piti o te a'oraa na Les Westrum ia, parau tumu, to'na mau mana'o aroha i te mau taata Tubuai o tei tauturu maitai ia raua i to raua parahiraa i te fenua nei e tae noa'tu i te feia api o tei tauturu i te ohipa no te hamaniraa i teie fare putuputuraa, e ia Iosepha Bénétiau hoi o tei tauturu maitahia no te mea o oia ibo te tamuta o tei maitihia e te

Peresideni Amaa, oia o Emile H. e ua oto roa o Les i te faaiteraa i ta'na mau parau faaitoito i roto i te mau melo o te Ekalesia.

Te 3 o te a'oraa na Tetauira Tabiata ia, parau tumu, Te mana'o o Solomona i te paturaa i te hiero o te Atua.

E ua faaotihia te pureraa na roto i te Himene N^o 35 e na Teuruna a Tehoiri i aratai.

E na Toma Stone te pure hopea e mea na rotohia ia i te reo farani. Te mau taata i tae mai 116.

I te faaotiraa te pureraa tomoraa, ua faaineinehia te tamaaraa. E ua tamaa atura te mau taata atoa, e rave rahi roa te huru o te maa tei faaineinehia no te opu.

I te hora 4 i te taperaa mahana, ua haaputu faahou o Elita Peresideni i te mau Peresideniraa Amaa e to te mau pupu atoa i roto i te fare pureraa no te hoê Apooraa no nia i te mau ohipa o te toro'a e mauhia e ratou, e te huru no te faatereraa i te mau ohipa a te Ekalesia.

I te pô i tana mahana ihora, na faatupuhia te hoê haapiiraa hoho'a no te mau taata paari e te feia api atoa.

Ua haamatahia i te hora 8 i te ahiahi, na Taroa Tehahe i faatere e na Tumarae, i aratai. Himene matamua, na te Amaa Ziona, pure matamua Tetauira Tabiata. E na Iosepha Bénétéau te parau matamua no nia iho i te mau ohipa tuatapaparaa no teie fare api, e tae noa'tu i te parau haa mauruururaa i te mau taata o tei tauturu i teie ohipa e te mau pupu tuahine atoa o te faaamu maitai i te mau rave ohipa, e ua faatumuhia teie parau i roto i te (Salamo 122:9)


"No te fare o to tatou Atua ra o Iehova e tamau ai au i te imi

i te maitai no oe ra.” I muri a’e i teie paipaparaa ua faaterehia te Haapiiraa hohoa, e tae noa’tura i te hora 10 i te pô, ua faaotihia te haapiiraa hohoa na roto i te himene N° 134, na te Amaa o Mahu i aratai, e na Yaraearii a Yarohirani te pure hopea. I muri iti noa ihoa ua horoahia te hoê taima i te feia Api, no te hoê oriraa na ratou e tae noa atu i te taima e faaoti ai ratou, e ua na reirahia e mea maitai roa, e ua hoi atu te Peresideni ra o Elita, na tamahine, e na orometua e Nina i Tabuia, e ua tapae atu ratou i te fare o Iosepha Bénêteau i te hora ahuru ma hoê e te afa i te pô na nia i te hoê camionette faito tahito roa, e mea turai noa ei reira e haruru ai.

E no te faaotiraa i teie nei tuatapaparaa, te faatae atu nei to outou hoa o Iosepha Bénêteau e to’na hoa ta’na, mau tamarii e to Tubuai ma i te tapao o to ratou aroha i te mau feia tai’o vea o te Heheuraa Api e i te mau melo atoa o te Ekalesia. (Kolosa 2:5) *Taa é noa mai á tau tino nei, tei ó outou á tau varua, i te oaoaraa i te hi’oraa’tu i ta outou haapao maitai, e te papu o to outou faaroo i te Mesia ra.*

Ia orana i teie Matahiti Api.

Papaihia Iosepha Beneteau.



Te Mau Haapiiraa No Te Avae Eperera.

TE PARAIMERE

IRAVA TAMAU AAU NA TE PARAIMERE

Inaha, to'u nei fare e fare nahonaho ia, te na reira mai nei te Atua te Fatu ra, eiaha ra e fare no te ahoaho. (Buku Fafau 132:8.

Pupu 1 (i raro i te 4 no to ratou matahiti)

Hepedoma 1: Pane no te Ra'i Mai

Hepedoma 2: Ua Hamani te tamarii o Iseraela i te Fare Pureraa no ratou

Hepedoma 3: Te himene mauruuru a Davita

Hepedoma 4:

Pupu 2 (5-6 matahiti)

Hepedoma 1: Horoa'tu ia vetahi ê; Ta tatou mau haamaitairaa.

Hepedoma 2 Te Itoito Daniela pene 1, 2, 6

Hepedoma 3 Te faaoreraa i te hara

Mataio 18:22-35

Hepedoma 4 Te Pure Genese 21:13-21

Pupu 3 (7-8 matahiti)

Hepedoma 1: Te tantururaa ia vetahi ê; Luka 10:30-35

Hepedoma 2: Te faaoreraa i te hara - - Mataio 6:14:15

Hepedoma 3: Faaoreraa i te hapa

Hepedoma 4: Te oaoaraa

Pupu 4 (9-12 matahiti)

Hepedoma 1: Te Bapetizoraa Mataio 3:16-17

Hepedoma 2: Te Horoaraa o te Varua Maitai

Hepedoma 3: Hi'opoaraa i na irava matamua e maha no Te Hiroa Faroo.

Hepedoma 4: Te Mana Mau

HAAPIIRAA SABATI:

E PARAU HAAMANA'ORAA ORO'A

"E te mau mea atoa ta outou i hinaaro ia vetahi ê ra, e na reira atoa'tu outou ia ratou". Mataio 7:12.

Pupu 1 (I raro i te 6 o te matahiti)

Haapiiraa i mana'ohia e te orometua, e te papairaa

Pupu 2 (6-9 matahiti)

Hepedoma 1: Lehi e to'na utuafare I Nephi 1-5

Hepedoma 2: Sabati Amuiraa

Hepedoma 3: Arataihia e te Fatu I Nephi 7:16-18

Hepedoma 4: E farue te maitai i te ino Nephi 2 pene 2.

Hepedoma 5: Hi'opoaraa

Pupu 3 (10-12 matahiti)

Hepedoma 1: Iosepha i te faaoreraa i te hara Genese 42 e te 45:15

Hepedoma 2: Sabati Amuiraa

Hepedoma 3: Iseraela i te Fenua Aiphiti Genese 45:16-28 Genese 46:17 Genese 46:27-34; Genese 45:50

Hepedoma 4: Hi'opoaraa Genese

Hepedoma 5: Te Faaineineraahia o Mose Exodo pene 1 e tae atu i te 4.

Pupu 4 (13-15 matahiti) No roto mai i te buka "TA
IESU I HAAPII"

Pupu 5 (16-19 matahiti) No roto mai i te HIROA FAA-
ROO

Pupu 6 (20-25 matahiti) No roto mai i te Hiroa Faaroo

Pupu 7 Feia paari) Te Mau Ture Matamua no te Evane-
lia A tai'o na i te mau haapiiraa o te haponohia'tu
ia outou.

TE MAU TUAHINE

E haapii te mau tuahine i te mau parau no nia i te
Buka a Moromona mai te au i te mau haapiiraa e haapono-
hia'tu ia outou.

Te parau tumu no te mau tuahine hahaere:

"E ore e tia ia outou ia parau, a arataihia'i outou i
taua hopea ri'ari'a ra, e tatarahapa vau, e farii vau i to'u
Atua. Eita, e ore e tia ia outou ia parau i te reira; no te
mea e mana a to taua varua, tei roto i to ratou tino i te maha-
na e pohe ai outou ra, i nia i to outou tino i taua ao mure ore
ra." (Alama 34:34)

TE FEIA API

Te parau Tai'o na te Feia Api: "Aore hoi au i haa-
ma i te evanelia a te Mesia ra, no te mea o te mana ia o te
Atua ia ora te fuaroo ra; te Ati Iudana e te Heleni atoa hoi"
(Roma 1:16)

Pupu 1 (I raro i te 12 matahiti) Te mau aamu no roto
mai i te parau tuatapaparaa no te Ekalesia.

Pupu 2 (12-16 matahiti) Te haapiiraa Scout.

Pupu 3 (17-25 matahiti) Te haapiiraa no nia i te Buka
a Moromona mai te haponohia'tu ia outou.

Pupu 4 (Feia paari) Te haapiiraa no nia i te PARAU

TUATAPAPARAA NO IOSEPHA SEMITA.

A haapii outou i te hoê pene i roto i te hebedoma hoê.

TE AUTAHU'ARAA

Hebedoma 1: Te Ora no te Feia i pohe ra.
Ioane 3:5; Ohipa 4:12; Moroni 8:9-23; Petero 1
3:18-20; Ioane 20:17.

Hebedoma 2: Amuiraa.

Hebedoma 3: Te Atua i Roto i To'na Huru Taa-
ta hamani ra. Genese 1:1-31; Mose 1:39; Sala-
mo 121:1-8.

Hebedoma 4: Te taata nei i roto i to'na tiaraa
hamani. Salamo 8:3-9, 37:7-11; Genese 1:28.

Hebedoma 5: E hi'opoaraa (Ua riro teie nei
haapiiraa ei hi'opoaraa i te mau parau i haapiihia
e tatou mai te avae Tenuare mai â.

Haapiiraa na te mau haapii hahaere:

Te Hiroa faaroo numera 4: *Te faaroo nei matou e, o taua
mau faaueraaa ra, te matamuaraa, o te faaroo ia i to tatou
Fatu ia Iesu Mesia; te pitt, te tatarahapa ia; te toru, te
Bapetizoraa ia i raro i te pape ia matara te hara; te maha
ra, te tuuraa rima no te horoaraa'tu i te Varua Moitai.*

Mau Irava tanturu: Mau Irava Parau api 1: Ioane
17:3---Mataio 3:16 Kolosa 2:12, Roma 6:6, Ephesia 4:5-
Nephi 3 pene 11:22-28; Ohipa 29:1-6, Ohipa 8:14-20,
Moroni 10:5, Alama 32:21.

PARAU RII API

TO TATOU HOA TAMAITI, ERNEST WONG

I te 22 no Tenuare, mahuta atura o Ernest Wong, na nia i te Manureva Tela, i te Fenua Marite.

E homa e, e melo hoi teie no roto i te pūpū Paraimere. E tamaiti itoitō roa hoi teie i roto i te mau ohipa no taua pūpū ra, area rā, te vai nei te hoē ma'i i nia i to'ua avae mai to'na api roa raa mai. E no te ite raa hoi te Peresideni Misione e te mau orometua i taua ma'i ra, opua ana'e atura ratou i te imi i te mau ravea atoa ia reva'tu teie nei tamaiti i roto i te fare ma'i no te mau tamariki Paraimere no te Ekalesia a Iese Mesia i te Feia Mo'a no te Mau Mahana Hopea Nei, i te fenua Marite, e inaha, mahuta atura na te reva.

Teie hoi te huru no to'na tere. E tapae atu oia i Suva, mai Suva i Haawii, mai Hawaii, i San-Francisco, mai reira'tu i Utah, o te vahi ia oia e faaea'tu ai i roto i te fare ma'i no te mau tamariki Paraimere.

E no reira, i te mau vahi atoa ta teie tamaiti e tapae haere i roto i to'na tere, te tia'i noa maira te mau orometua ia'na i te mau vahi tapae raa pahi. Aue hoi te here o teie nei Ekalesia i to'na ra man melo, ua tupu roa hoi te oaoa rahi i te mau ohipa faahiahia e te maitai a te Ekalesia nei.

Na mahana i mua'e i to'na tere, ua faatupu to'na pūpū Paraimere i te hoē fariiraa no'na. Ua rahi roa to'na mau hoa i tae mai no taua fariiraa ra, tae noa'tu hoi i to te Ekalesia atoa. Ua tupu hoi te oto, e ua tupu atoa te oaoa no teie man ohipa maitatai i ravehia e to Ekalesia.

Te pure nei matou i te Atua ia haamaitahia teie tamaiti i to'na tere, e ia faaora atoa hia to'na ma'i.

I te 30 no Tenuare, matahiti 1956. Ca tapae maira te hoê Pahi Hopu Marite, oia hoi, (Sous-Marin) Tei nia iho te hoê tamaiti Moromona, to'na i'oa o (Melavina Cramer), no te tufaa fenua Aritona, te tufaa fenua ia o to tatou Peresideni o Ioane Orotona, e Keni Orotona. E Peresibutelo to'na toroa i roto i te Ekalesia nei.

I te mahana mau oia i tapae mai ai i nia i te uahu, te mea matamua ta'na i mana'o o te fare Orometua ia, e ua farii maitai maira te Peresideni Misione, e ta'na vahine, e te mau orometua ia'na, e ua tamaa ana'e i te fare orometua, e i muri iho, ua haere ana'e e faati i te fenua.

I te pô mahana toru, i roto i te pureraa Feia Api, ua faaite mai oia i to'na mana'o mauruuru i te Peresideni, e to'na hoa, e te mau orometua, tae noa'tu i to te Eklesia atoa,

I muri iho i taua pureraa a te Feia Api ra, ua faatupubhia te hoê fariiraa no'na, e ua horoa atu to te Ekalesia i te tahi mau tao'a rii Tahiti na'na, e ua tupu roa to'na oaoa.

I muri iho, ua faaterehia te tahi mau hohoa Cinema. E mea rahi roa te mau taata tei tae mai no taua farii raa ra, e no te mataitairaa i te mau hohoa nehenehe, e na ô atoa maira oia e, a haere mai outou i nia i te Pahi e mataitai. E ua na reira ana'e te tahi pae o te Ekalesia.

Te mahana i reva ai taua Pahi Hopu ra, ua tae ana'e atu te tahi pae o te mau melo o te Ekalesia, e ua faahei atura ia'na, e aroha atura, reva atura.